

**NÄIMILITO  
SIVNEDEM**

Näimilito, mii lii čuolmâdum eres ko evangelâš-luuteerlâš kirho kevttim oornigist, puáhtá sivnediđ, jis vihkâpaarâ nuuvt táttu (KO 2: 20).

Näimilito sivnedem tábáhtuvá kirhoost teikâ eres saajeest tađe mielđ ko ääšiuásásiih tast pappáin suápih.

Muusik valjiimist kalga väldiđ vuotân toimättäs immeelpalvâlusluándu. Toimättäsâst kolgâččij leđe kuittâg ohtâ salmâ. Muusiikist västid kanttor, já tast puáhtá táárbu mielđ savâstállâđ suin.

Sivnedem várás paarâ asättât álttár (paapâ) oovdân nuuvt, et nissoon lii almaa čžetpeln.

## I Laidiittäs

---

### \*1. Laidiittâsmuusik

---

Laidiittâsmuusik puáhtá leđe čuojânâsmuusik teikâ salmâ.

## 2. Álgusivnádâs

---

### Sivnádâs

Álgusivnádâs puáhtá celkkiđ teikâ lávlud.

**P** Eeji já + Alge já Pase Jiegâ noomân.

**S** Amen.

### Vuárutievättäs

**P** Hiärrá liävus tiigijn.

**S** Nuuvt še liävus sun tuu-uv jieggáin.

## 3. Laidiittâssäänih

---

Laidiittâssaaniđ puáhtá rähtiđ meiddei rijjâht. Pappâ ráhtá laidiittâssaaniđ jieš teikâ kiävttá čuávuvâš molsâiävtuid.

**P** Rähis usteveh, NN já NN. Tuoi lepee puáttám Immeel muáđui oovdân áánnud näimilittosâđ Immeel sivnádâs. Ráámmättist iättoo: ”Immeel sivnedij ulmuu jieijâs kovveen,

Immeel kovveen sun suu sivnedij, almajin já nisonin sun sivnedij sii. Immeel sivnedij sii.” (1. Moos. 1: 27–28)

## TEIKÄ

**P** Rähis usteveh, NN já NN. Lep Immeel muádui oovdâst táttumin näimilittosâd suu sivnádâs. Jeesus iätä: ”Maailm aalgâst Immeel sivnedij ulmuu almajin já nisonin. Tondiet almai kuádá eejis já eenis já ohtân eemeedis, nuuvt et taah kyevtis šoddâv ohtân uázžin. Nuuvt suoi iává innig lah kyehti, suoi lává ohtâ. Já maid Immeel lii ohtâdâm, tom iälus olmooš iärut.” (Mark. 10: 6-9)

## 4. Psalmâ

Puáhtá kevttiđ meiddei kirkkoive äigimudo teikâ eres psalmâid.

Psaalmâ puáhtá lávluđ teikâ luuhâđ. Ton aalgâst já loopâst puáhtá leđe antifoni.

Psaalmân labdoo Uccâ kunnee. Ton saajeest puáhtá kevttiđ salmâveerstâ 60:8. Uccâ kunnee kuáđdoo meddâl västuääigi, 5. västuääigi pasepeeivi rääjist.

## Antifoni

Räjitem lii Immeel rähisvuotâ,  
avalávt sun lii mijjân oskolâš.

Ps. 117: 2

## TEIKÄ

Tun, Hiärrá, lah lannaam já torvopáikkám,  
Imelâm, tunjin mun turvâstâm.

Ps. 91: 2

## Psalmâ

Tot, kote áásá Alemuu syejeest  
já ijâstâl Puohvâldáliei suoivust, iätä näävt:

”Tun, Hiärrá, lah lannaam já torvopáikkám,

Imelâm, tunjin mun turvâstâm.”  
 Hiärrá lebbe suájáidis tuu oolâ,  
 já tun lah torvoost toi vyeini.  
 Suu oskolâšvuotâ lii tunjin muvrâ já kolbâ.  
 Torvonâd lii Hiärrá,  
 páikkád lii Alemuu syejeest.

Ps. 91: 1–2, 4, 9

## TEIKÄ

Hiärrá lii lyetittettee puoh sanijnis,  
 oskolâš puoh tavoinis.  
 Puohah keččih vyerdimáin tunjin,  
 já tun adelah sijnân piämu rievts ääigi.  
 Tun leedah kiedâidâd  
 já pyerivuodâstâd piemah puoh mii iälá.  
 Hiärrá lii puohâst rievtsmielâlâš,  
 sun lii oskolâš puoh tavoinis.  
 Sun lii alda tom, kii čuárvu suu išseen,  
 tom, kote jurgâlât suu piälán.  
 Sun tiävdá toi ánumijd, kiäh sust paleh,  
 sun kulá sii čuárvum já išseed sii.

Ps. 145: 13, 15–19

## TEIKÄ

Teedi muu seeilân vááimud vuástá,  
 piejâ seeilân kietâruottâsâd páádán.  
 Rähisvuotâ lii kievvrâ tego jäämmim,  
 kiijves já kallaanmettum tego tuonâ.  
 Ton acâkkistem lii tuulâ acâkkistem,  
 ton tullânjuovčâ lii Hiärrá njuovčâtullâ.  
 Stuorrâ čääsih iä pyevti tom časkâdid,  
 virde tulve ij tuálvu tom miäldâsis.

Jis kiinii falâččij tááluid já tävirijđ  
 rähisvuodâ hadden,  
 sun uážuččij tuše nubij pilhe.

Lavl. I. 8: 6–7

## Uccâ kunnee

Kunnee Iäčán já Aalgan  
 já Pase Jiegân,  
 tego lâi aalgâst, tääl lii já ain,  
 avalâšvuodâst avalâšvuotân. Amen.

## Antifoni kiärdoo

## 5. Rukkoos

Rukkoosavžuuttâs puáhtá čuávnuđ uánihis joskis rukkoos.

1. Pase Immeel, almalâš Iäččám,  
 tun lah rähisvuodâ nuvâhännáá käldee.  
 Kijtto näimilito läähjist.  
 Iššeed pelikuoimijđ anneed huolâ kyeimi kyeimistis,  
 nuuvt et sunnuu koskâsâš rähisvuotâ šodâččij nanosubbon.  
 Kuulâ mii Jeesus Kristus tiet.
2. Puohváldálâš Immeel.  
 Tun sivnedih ulmuu eellid oovtâst almajin já nisonin  
 já sivnájih sunnuu.  
 Adde pelikuoimijđ koskânâs rähisvuodâ.  
 Iššeed sunnuu pissood oskolâžžân  
 já rähistid kyeimi kyeimis šiev já paas peeivij.  
 Taam ruhâdállâp mii Hiärá Jeesus noomâst.
3. Immeel, puohâi sivnedeijee.  
 Tun adelah näimilittoost almaa já nissoon  
 pelikyeimin kyeimi kuáimâsis

Mij kijttep tuu tast,  
 et meiddei näimilitto suonjârd  
 sivnedempargood pyerivuodâ já muččâdvuodâ.  
 Adde sivnâdâsâd NN já NN liiton,  
 et suoi tast uážuččáin tevidid tuu adelem tooimâ  
 já väldid kijttevâžžân vuástá eellim laahjijd.  
 Kuulâ mii tun, kote lah puoh pyerivuodâ käldee.

#### 4. Almalâš Eeči.

Rähisvuodâstâd lah asâttâm näimilito  
 já koččom pelikuoimijd eellid sâánâd miel.  
 Iššeed sii rähistid kyeimi kyeimis,  
 tego Kristus rähistij servikode.  
 Iššeed pelikuoimijd anneed näimilittoos passeen  
 já nuâvdittid eellimstis tuu táatu.  
 Adde sunnui vyeimi pissod kyeimi kuáimâsis oskolâžžân.  
 Kuulâ mii Algaad Jeesus Kristus,  
 mii Hiärá tiet.

## 6. Ráámmátluuhâm

Lohhoo ohtâ teikâ mottoom čuávvuvâš ráámmátteevstâin. Puáhtá kevttid meiddei ráámmátteevstâid kirkkoive äigipuudâ miel teikâ eres ráámmátteevstâid.

Lohhee almoot ráámmátpitá.

Ráámmátluuhâmân puáhtá labdeđ vâstâdâs (psaalmâ, saalmâ, lavluu, čuojânâs-muusik teikâ joskis smietâdem).

1. Moos. 1: 27–28

Immeel sivnedij ulmuu kovenis, Immeel kovveen sun suu sivnedij, almajin já nisonin sun sivnedij sunnuu. Immeel sivnedij sunnuu já eedâi sunnui: ”Kolgâvettee lede heedâlmliih, lasanid já tevidid eennâm já aimâkkâššâd tom.

Haldâšid meerâ kuolijd, alme luudijd já puoh, mii eennâm alne iälá já liihâd.”

1. Kor. 13: 1, 4–8, 13

Veik mun sárnuččim ulmui já engâlij kielâigijn mut must váiluččij rähisvuotâ, liččim tuše skilkkee veški teikâ skilijdeijee symbaal.

Rähisvuotâ lii kierdâvâš, rähisvuotâ lii läädis. Rähisvuotâ ij kaadâšt, ij räämid, ij rammuustâl, ij kevâttât vyevittemeht, ij uusâ jieijâs oovdâ, ij njunáduu, ij muuštâč kierdum paaid, ij illood puástuvuodâst mut illood tuotâvuodâ vyeitidijn. Puoh tot killáá, puohâst osko, puohâst tuáivu, puoh tot killáá. Rähisvuotâ ij kuássin lappuu.

Nuuvt pisoh taah kulmâ: osko, tuáivu já rähisvuotâ. Mut stuárráamus toin lii rähisvuotâ.

Ef. 4: 32 – 5: 2

Kolgâvetted lede kyeimi kuáimásâd ustevliih já ládáseh já adelid kyeimi kuáimásâd addâgâs, tego Immeel-uv lii adelâm tijjân addâgâs Kristus tiet. Toollâd tääl Immeel ovdâkovenâd, leppedhân suu rähis párnááh. Rähisvuotâ jodettus elimâd, liihân Kristus-uv rähistâm mii já adelâm mii tiet jieijâs adaldâhhân, šievoopsâg uhren Imelân.

Fil. 4: 4–7

Ilodid ain Hiärást! Eedâm vala ohtii: ilodid! Puáduš tii lädisvuotâ puohâi ulmui tiätun. Hiärrá lii jo alda. Elled huolât masten, mut pyehtid ain tom, maid taarbâšvetted, ruhâdâlmáin, ánumáin já kijttemáin Immeel tiätun. Talle Immeel ráávhu, mii lii puoh ibárdâs paajaabeln, varjâl váimuidâd já jurduidâd, nuuvt et pisovetted Kristusist Jeesusist.

Kol. 3: 12–14

Tij, kiäh lepped Immeel väljejum ulmuuh, paseh já sunjin rákkáseh, kárvudättâd tääl váimulii ärmittetteevuotân, ustevlâšvuotân, vyeligâšvuotân, lädisvuotân já kierdâvâšvuotân. Anneed huolâ, et piergiivettes koskânâd, adelid kyeimi kuáimásâd addâgâs, veik tist ličij-uv aggâ läittimân. Tego Hiärrá lii adelâm tijjân addâgâs, nuuvt adelid tij-uv. Mut puoh ruvnân puáduš ráhisvuotâ, tastko tot taha puoh tievâslâžžân.

1. Joh. 4: 9, 11–12

Tast Immeel ráhisvuotâ almostui mii koskâvuotân, et sun vuolgättij áinoo Algees maailmân adelid mijjân eellim. Ráhis ustevveh! Ko Immeel lii mii näävt ráhistâm, kolgâp mij-uv ráhistid kyeimi kuáimán. Immeel ij lah kihheen kuássin uáinám. Mut jis mij ráhistep kyeimi kuáimán, Immeel piso mist já suu ráhisvuotâ lii juksâm mist mittomeres.

Matt. 19: 4–6

Jeesus iätä:

Epped-uv lah luuhâm, et Sivnedeijee áalgust rahtij ulmuu almajin já nisonin? Tondiet almai kuádá eejis já eenis já ohtân kálgusis, nuuvt et taat kyevtis šoddâv ohtân uáččin. Suoi iává tääl innig lah kyehti, suoi lává ohtâ. Já maid Immeel lii ohtâdâm, tom iälus olmooš iärut.

Joh. 2: 1–11

Oho kuálmád peeivi viettii Galilea Kaanast heejâid. Jeesus enni lâi tobbeen, já meiddei Jeesus já suu máttáättâspárnááh lijji kuččum heejâid. Vijni nuuvâi koskân, já enni cedâi Jeesusân: ”Sist ij lah vijni.” Mut Jeesus västidij: ”Tipte muu



orrood, kálgu. Muu äigi ij lah vala puáttám.” Suu enni eedâi palvâleijeid: ”Maid sun tijjân sárnu–uv, porgâd nuuvt.”

Tobbeen lijiii kuttâ kedgičäcilite juudalâš udhij miel putestem várás; toh kessii muáddi mito. Jeesus eedâi palvâleijeid: ”Tevdid liitijd čassijn”, já sij tevdiid taid roobdâi táásá. Talle sun eedâi: ”Väldid tääl tast já tuálvud tuálu koccei”, já sij tolvuu. Koccee keččâlistij čääsi: tot lâi muttum vijnin. Nubenáál ko palvâleijeeh, kiäh lijiii čääsi litteest váldám, sun ij tiättám, kost vijni lâi puáttám. Sun kočoi irge já eedâi: ”Puohah fäälh vistig šiev viijni já talle, ko kyesih älgih uáivádud, hyeneeb. Mut tun lah šiaštám šiev viijni taan räi.”

Taat lâi Jeesus tobdospargoin vuossmuš, já sun poorgâi tom Galilea Kaanast. Sun almottij toin kirkesvuodâs, já suu máttáattâspárnááh uskuu sunjin.

Joh. 15: 9–12

Jeesus iätá:

”Tego Eeči lii rähistâm muu, nuuvt lam mun rähistâm tii. Pissood muu rähisvuodâst. Jis nuávditvetted muu pákkumijd, tij pisovetted muu rähisvuodâst, tego mun lam nuávdittâm Iäččán pákkumijd já pisom suu rähisvuodâst. Lam sárnum tijjân taam, et tist ličij muu ilo jieijâd vááimuin já tii ilo šodâččij tievâslâžžân. Muu pákkum lii taat: rähistid kyeimi kuáimád tego mun lam rähistâm tii.”

## 7. Saahâ

Pappâ sárnu rijjâht teikâ kiävttá näimiliiton vihkâm saavâid. Saavâst kolgâččij kietâdállâđ čuávvuvâš fáádáid:

- näimilitto Immeel asâtem oornigin
- näimilitto pelikuoimij šoddâm saijeen
- peerâ ohtâsâškode vuáđuhtâdâhhân

- ilo já kijttevâšvuotâ
- rähisvuotâ já oskolâšvuotâ
- tobdo já táttu
- addâgâsáánum já -adelem
- huolhij já ustevij toorjâ

Taan saajeest puáhtá kevttiđ meiddei Näimiliiton vihkâm myenster 4A saavâid (pittä 9).

### III Sivnedem

---

Servikodde puáhtá čuázžud pitái 8–9 ääigi.

#### 8. Koččâmušah

---

**P** Tuoi lepee puáttám Immeel muáđui oovdân táttud suu sivnádâs näimilittosâd.

Pappâ kojâd irgeest:

NN, táátuh-uv näimilitostâd, ko lah tääl naaijâm NN:áin / NN:ijn, čäittid sunjin oskolâšvuodâ já rähisvuodâ mieti- já vvestikeevâdijn?

Vástádâs:

Táátum.

Pappâ kojâd myerssest:

NN, táátuh-uv näimilitostâd, ko lah tääl naaijâm NN:áin / NN:ijn, čäittid sunjin oskolâšvuodâ já rähisvuodâ mieti- já vvestikeevâdijn?

Vástádâs:

Táátum.

#### 9. Pelikuoimij sivnedem

---

Vihkâpaarâ luášádât idduid is oolâ, jis máhđulâš.

**P** [Immeel, almalâš Eeči,  
adelus tunnui iiloos já sivnádâsâs.

Immeel áinoo Alge  
liävus pyerivuodâstis tunnuin nuuvt ilo ko murrâš peeivij.

Immeel, Pase Jieggâ,  
áásus tunnust já kulgâttus avalávt rähisvuodâs tunnuu  
váimoid. ]

Sivnedus tunnuu kulmâohtâsâš Immeel,  
Eeči já (+) Alge já Pase Jieggâ.

### TEIKÂ

**P** [Immeel Jieggâ läidejus tunnuu,  
Immeel vyeimi varjâlus tunnuu,  
Immeel vijsesvuotâ máttááttus tunnuu,  
Immeel kietâ suojâlus tunnuu,  
Immeel luoddâ adelus tunnui sunde].

Sivnedus tunnuu, NN já NN, puohváldâlâš já ármugâs  
Immeel,  
Eeči já (+) Alge já Pase Jieggâ. Aamen.

### TEIKÂ

**P** Hiärrám Jeesus Kristus ármu já Immeel rähisvuotâ já Pase  
Jieggâ uásâlâšvuotâ liävus tunnuin.

**S** Aamen.

## 10. Salmâ

Saalmâ saajeest puáhtá leđe eres hiäivulâš muusik.

## 11. Ohtâsâš ovdârukkoos

Rukkoos puáhtá rähtid meiddei rijjâht. Miöldiorrooh pyehtih väldid uási rukkoos  
rähtimân.

**P/O** Ruhâdâllup.

1. Immeel, rähis almalâš Eeči. Ruhâdâllâp sivnâdâsâd NN:n já NN:n. Sivned sunnuu pääihi. Nanosmit sunnuu koskâsâš rähisvuodâ. Adde sunnui ovdâsvástâdâstobdo já oskolâšvuodâ. Iššeed sunnuu vyeittid kivsâdâsâid. Varjâl sunnuu rummâš já siälu. Joodeet sunnuu ubâ cellim ääigi já adde iššâád cellim vädis peivijd. Nanosmit sunnust osko já tuáivu. Tuáivu sunnuu ohtii avalii pááikán, kirkesvuotân. Kuulâ rukosân Hiärrám Jeesus noomâst.
2. Puohvâldâlâš Immeel. Jis tun jieh huksii táálu, te huksejeijeeh pargeh tušij tiet. Oovtâst täid pelikuoimijd kyeimi kuáimâsis rähisvuodâin já passoot sunnuu näimilito noomâd kunnen. Iššeed sunnuu huksid pääihi, mast osko, tuáivu já rähisvuotâ haldâččeh. Adde sunnui Pase Jieggâd, nuuvt et suoi iälâččâin ráávhust tuu sivnâdâsâst. Iššeed sunnuu kištottâllâđ oskoost já tuáivu sunnuu ohtii alme pááikán. Kuulâ mii Jeesus Kristus, mii Hiärá tiet.
3. Immeel, mij kijttep tuu rähisvuodâ adalduvâst. Sivned NN já NN, kiäh lává ovdâstâd naaijâm. Mij kijttep tuu tast, et suoi rähistává kyeimi kyeimis, lyettiv kyeimi kuáimâsis já táttuv anneđ kyeimi kyeimistis huolâ čoodâ elimis. Ruokâsmit sunnuu šoddâđ ain aldasub ohtâvuotân, nuuvt et mihheen ij iäruttiččii sunnuu. Iššeed sunnuu puoh elimis puudâin rähistid kyeimi kyeimis já pissod kyeimi kuáimâsis oskolâžžân. Varjâl sunnuu puácuvuodâst já luhottesvuodâin, puohâst, mii puávtâččij vahâgittid. Jis miinii killáamušâid tiäivá, adde tom tuáivuđ sunnuu ain aldeláá kyeimi kyeimis já tuu. Taam ruhâdâllâp Jeesus Kristus peht.

**S** Aamen.

## 12. Mii Eeči

---

Hiärá rukkoos ciälkkoo oovtâ jienân.

**S** Mii Eeči, kote lah oolmijn.

Pasottum liävus tuu nommâ.

Puáduš tuu vâldikodde.

Šados tuu táttu meid eennâm alne nuuvtko almeest.

Adde mijjân onnáá peeivi mii jyehipiäiválii leeibi.

Já adde mijjân mii suddoid addâgâš,

nuuvtko mij-uv addâgâš adelep toid,

kiäh láá mii vuástá rikkom.

Já ele joodeet mii kivsádâšân,

mut peesti mii paast.

Tastko tuu lii vâldikodde já vyeimi já kunnee nuvâhánnáá.

Aamen.

## 13. Sivnádâš

---

Sivnádâš maŋa pappâ addel pelikuoimijd Ráámmát.

**P** Hiärrá sivnedus tii já varjâlus tii.

Hiärrá čuovvâduš muáđuidis tijjân

já liävus tijjân ármulâš.

Hiärrá jurgâlus muáđuidis tii piälán

já adelus tijjân ráávhu.

Eeji já + Alge já Pase Jiegâ noomân.

**S** Aamen.

## 14. Vuolgâtem

---

Avžuuttâs iättoo tallan ovdil vuolguu.

**P** Vyelgid ráávhust já palvâlid Hiärá ilodin.

## \*15. Loppâmuusik

---

Loppâmuusik puáhtá leđe salmâ, laavlâ já/teikâ čuojânâsmuusik.